

5. august 2016

UKA 2016/36

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Ullutsinnut naleqquttumik ingerlatsinikkullu illersorneqarsinnaasumik Inuusuttut Inuiaqatigiinni Kiffartuussisarnerisa eqquteqqinneqarnissaanik inassuteqaasiortussamik suleqatigiissitamik Naalakkersuisut pilersitseqqullugit peqquneqarnissaanik Inatsisartut aalajangiiffigisassaattut siunnersuut. Inernera Inatsisartunut saqqummiunneqassaaq UPA2017-imi. (Siumup Inatsisartuni ilaasortaaitai)

Tunngavilersuut:

Namminersornerulernitta kingornagut Nunatsinni pilersinneqartut nutaat pitsaasullu ilagaat Inuusuttut Inuiaqatigiinnik Kiffartuussisarnerannik aaqqissuussineq 1980-imi eqqunneqartoq. Ilaatigut inuusuttut suliffissaaleqisarnerisa akiorniarnernanut atorneqartoq. Ajoraluartumilli aaqqissuussineq taanna 2007-imi atorunnaarsinneqarpoq.

Taamanikkut Inuusuttut Kiffartuussisarneranni siunertaasut ilagaat inuusuttut suliffissaaleqisarnerat oqimaalliartuinnartoq akiorniarlugu suliffissaqartitsisarnissaq. Taamanikkut Kommunit Inuusuttunik sulliveqartitsinerisa siunertaralugu inuusuttut suliffissaaleqisut piginnaanngorsarfiusumik suliffissaqarnissaanik neqeroorfigisarnissaat anguniarlugu inuusuttup ilinniartitaanikkut piginnaasaqarfigilersimasaasa suliffeqarnikullu piginnaasaqarfigilersimasaasa piujuaannarnissaat. Taamanikkullu aaqqissuussinerup aamma siunertaraa inuusut sulisinnaassutikkut piginnaasaqarnerulernissaat ilanngullugit naleqqussallaqqinnerunissaq suleqateqallaqqissinissarlu, piumassusdeqarnissaq akisussaaqataanerunissarlu, aammali inuusuttup ilinniagaqalernissamut suliffissamillu toqqaanissamut periarfissaasa pitsaanerulernissaat.

Taamanikkut aaqqissuussinermi aningaasartuutit Kommunit Namminersorlutillu oqartussat nammaqatigiissumik kivippaat, tassani aningaasarsiaritinneqartut 50 %-tiat kommuninit ingerlanneqarmat. Tamannalu nammaqatigeeriaaseq aaqqissuusseqqinnissami attatiinnerneqarsinnaasariaqarpoq taamaaliornikkut inuusuttut suliffissaaleqinerisa akiornernanut aningaasartuutit ataatsimoorfigalugit nammaqatigiiffigalugit.

Aaqqissuussineq taanna aqutigalugu Nunatsinni inuusuttut Nunatta piorsarneqarnerani ineriartortinneqarneranilu peqataanerat timitalersorneqalerualarpoq.

Inuiaqatigiinnik sullissineq taanna aqutigalugu savaateqarfiit narsaasiornerni aqquserniornerinilu inuusuttut iluaqutaallualeraluarput, nunaqarfinni isorliunerusunilu nammineq illuliassat sananeqarnerini ikiortaallualeraluarlutik, illoqarfiit saligaatsuutinnerannut malunniuteqalerualarlutik.

Aaqqissuussisimaneq taanna arlalitsigut aamma sanngeequteqarsimavoq. Ileqqorissaarneq suliamillu nakkutilliilluarneq amigaataasarsimapput, aammalu imigassamik ajornartorsiuteqarneq inuiaqatigiinnik sullissinnermuttaaq akornusersuingaatsiarsimaqaluni. Soorunami Siumup naatsorsuutigaa suleqatigiissitap suliaqarnermini taamanikkut ajornartorsiutaasimasunik pingaartitilluni inissiilluarumaartoq.

Kisianni aqqissuussinerup taamaattup Inuusuttut kiffartuussisarnerisa isumaa itisooq – tassalu Nunatsinni innuttaasut Nunatta piorsarneqarnerani suleqataanissaat kiisalu imminnut ilisareqatigiinnerulernissaat – ullumikkut taamanikkutuulli pingaaruteqartigaaq. Allaammi oqartoqarsinnaavoq ullumikkut tamanna suli pingaaruteqarnerulersimasoq.

Tamanna tunngavigalugu naalakkersuisut kajumissaarpavut inuusuttut inuiaqatigiinni sullissisarnerata atuutiqinnissaanik pilersaarusiortussamik suleqatigiissitalioqqullugit, ukiup ataatsip ingerlanerani siunnersuummik saqqummiussinissaat siunertaralugu.

Inuusuttut peqatigiiffiisa kattuffiat Sorlak, Timi asimi, SIK, KNAPK, NUSUKA, Kommunillu siunnersuusiortnermi peqatissarineqarsinnaapput, suliassap ilusilersornissaa siunnersuusiortussallu inuttalersornissaat eqqarsaatigalugu.

Pisortanut aningaasaqarnikkut allaffissornikkullu kingunerisassai:

Missigiunneqarpoq suliassamut aningaasartuutit AC-tut atorfeqartitamut aningaasartuutaasartut affaat qaangissanngikkaat, tassa 250.000 kr. Taakku AC-tut atorfilimmut aningaasartuutissat saniatigut suleqatigiissitaliamut aamma aningaasartuuteqartoqassaaq 250.000 kr. missaani. Taamaalilluni aningaasartuutit katillugit 500.000 kr. Missaaniissallutik. Tamanna suliassaq suliassaqarfimmut aningaasaliissutaareersut iluanni naammassineqarsinnaassaaq.

Inuusuttut kiffartuussisarnerat aallarteqqippat naatsorsuutigineqassaaq ukiumut 20 mio. Kr. Missaasa aningaasartuutaasarnissaat, taakku iluanni inuusuttut 150 missaat nunarput tamakerlugumeersut suliassanullu pisortassat ilaatinneqarput. 2003-imi taamanikkut namminersornerullutik oqartussat Kommunillu 18-usut tamatuma missarpiaani aningaasartuuteqarput. Siumumiilli naatsorsuutigineqarpoq Inuusuttut Kiffartuussisarnerisa eqquteqqinneqarnissaata aningaasatigut qanoq kinguneqarsinnaanera suleqatigiissitap misissueqqissaarnermigut inissilluarumaaraa.

Namminersorlutik inuussutissarsiortunut aningaasatigut allaffissornikkullu kingunissai:

Misissuinermut atatillugu toqqaannartumik sunniuteqassanngilaq.

Inunnut ataasiakkaanut aningaasatigut allaffissornikkullu kingunissai:

Misissuinermut atatillugu toqqaannartumik sunniuteqassanngilaq.